

նապուծն գթասցի, ամենողորմն շարժեսցի զբեկեալ սիրտ Հայոց բերկրեցուցանել, տալով վերստին զվիճակն սուրբ՝ զվանս առաքելոյն Յակոբայ, եկայք առ գերեզմանն իմ, աւետեցէ՛ք զմեծ խրախուժեան աւետիսդ, զի զովասցի պապակեալ անձն իմ հողամած որ և տրտմալից: Ո՛վ որդեակ իմ, գրեա՛յ զայս ամենայն ի մատենի քում առ յիմոյ յիշատակի և լա՛ց ընդ մահտեսի մարբդ, զի աշխարհ մի ասացէ ինձ անորդի ի կեանս ցաւալից: Ո՛վ սիրասունդ, բաւ է այդքան կոճն քո առ տառապեալ հայրս<sup>1)</sup> քո, զի ո՞վ է որ ոչ չուեաց յուեայն կենցաղոյս՝ զի ես մնացից: Տո՛ւք զհողն ի վերայ հողոյս և աղօթեցէ՛ք վասն ոգոյ թըշուաւացելոյս, զի ես ճանապարհորդեցի երթալ առ Արարիչն իմ և ի Քրիստոս յոյսն ամենեցուն: Զայս ամենայն ասէր և կական բարձեալ արտասոււթոր աչօք եւ յոյժ ողորմուկ՝ նկատելով զմերձ նստեայսն առ նալ: Եւ մեր խոնարհեցուցեալ զզլուխ ընդ ասացելոցն բանից, սիրաք մեր ճմլէին և փղձկանս<sup>2)</sup> հարեալ զբողոք բառնայաք, զի զվերջին աւրհնութեան տեսս և զհրաժարականն մատուցանէր զողջոյն: Բայց յառաւել սիրոյ նորա ամփոփէաք մերթ առ խօսս ինչ եւ մերթ ապա յարտասուս կսկիծ, զի մի նուազեսցի տեսեալ զմեզ հառաչալից: Եւ ապա ծանրանայր ցաւօք և թեթեանայր մարմնով ի կերակրոց և յրմպելեաց. և յերրորդ ժամու յաւուր Դշի<sup>3)</sup>, որ նոյեմբեր ամսոյ յերրորդի աւանդեաց երանելին զհոգին ի ձեռս հրեշտակաց Աստուծոյ ուզիդ դաւանութեամբ և ճըշմարիտ խոստովանութեամբ ի Քրիստոս Յիսուս ի Տէր մեր, ի մարմին եւ յարիւն նորա միանալով բովանդակապէս եւ նորայն փառաւորակից: Եւ զայն օր թողեալ և երեկոյէ մինչև յառաւօտ պաշտմամբ և պա-

1) հարս.

2) փղցկանս.

3) Զշի.